



Na osnovu čl. 6. Uredbe o osnivanju Ureda Vlade Kantona Sarajevo za dijasporu („Službene novine Kantona Sarajevo“, broj: 25/22 i 40/25) i članova 20. i 22. Zakona o udruženjima i fondacijama („Službene novine Federacije Bosne i Hercegovine“, broj: 45/02), Šef Ureda Vlade Kantona Sarajevo za dijasporu donosi

## **STATUT FONDACIJE „ZAJEDNO SA DIJASPOROM ZA JAČU DOMOVINU“**

### **Član 1. (Predmet Statuta)**

Ovim Statutom uređuju se: naziv i sjedište Fondacije „Zajedno sa dijasporom za jaču domovinu“ (u daljem tekstu: Fondacija); status, misija i vizija, trajanje i teritorij djelovanja, ciljevi i djelatnosti Fondacije, angažiranost, organi Fondacije; druga tijela Fondacije, dužnosti članova organa Fondacije, način izbora i imenovanja predsjednika i članova Upravnog odbora Fondacije, ovlasti, obaveze obaveze i akti Upravnog odbora, trajanje mandata, ovlasti predsjednika Upravnog odbora, sjednice Upravnog odbora, kvorum i način donošenja odluka, obavezna prisutnost, donošenje odluka u vanrednim situacijama, donošenje odluke o razrješenju predsjednika i članova Upravnog odbora, razlozi za prestanak članstva u Upravnom odboru, naknada za rad, odsustvo predsjednika, način glasanja na sjednicama, profesionalna etika i povjerljivost, sukob interesa, imenovanje, razrješenje, prava i obaveze direktora Fondacije, razlozi za donošenje odluke o razrješenju direktora, zastupanje i predstavljanje Fondacije; opis oblika, sadržaj, čuvanje i upotreba pečata Fondacije; opis oblika i sadržaj znaka Fondacije; sredstva Fondacije, nekretnine, materijalna i nematerijalna dobra Fondacije, troškovi Fondacije, pravila za ostvarivanje, korištenje i raspolaganje sredstvima Fondacije, program rada i finansijski plan, vođenje poslovnih knjiga, obaveza dostavljanja izvještaja o finansijskom poslovanju i radu Fondacije Osnivaču, nadzor, postupak za izmjenu ili dopunu Statuta, osnivanje podružnica van teritorije Bosne i Hercegovine; uslovi i postupak za pripajanje, razdvajanje, transformaciju ili raspuštanje, odnosno prestanak rada Fondacije; pravila za raspodjelu imovine u slučaju prestanka rada Fondacije; javnost rada Fondacije; supsidijarna primjena propisa, čuvanje Statuta i stupanje na snagu Statuta.

### **Član 2. (Naziv i sjedište)**

- (1) Puni naziv Fondacije glasi FONDACIJA „Zajedno sa dijasporom za jaču domovinu“.
- (2) Skraćeni naziv Fondacije je : „Fondacija „Za domovinu““.
- (3) Sjedište Fondacije je na adresi Aleja Bosne Srebrene bb, 71000 Sarajevo.
- (4) U slučaju promjene sjedišta Fondacije, kao i svake druge statutarne promjene, organi Fondacije

će, u roku od 15 dana, o istom obavijestiti organ nadležan za poslove vođenja Registra fondacija u FBiH.

### **Član 3. (Status)**

Fondacija ima status pravnog lica, sa svim pravima i obavezama pravnog lica, a stiće ga danom upisa u registar kod nadležnog ministarstva u skladu sa zakonom.

### **Član 4. (Misija i vizija)**

(1) Misija Fondacije će biti doprinos održivom razvoju domovine i Kantona Sarajevo kroz aktivnu saradnju sa bh. dijasporom, promovisanje zajedničkih interesa i djelovanje u zemljama gdje živi bh. dijaspora.

(2) Vizija Fondacije bi bila da postane ključni most između domovine, Kantona Sarajevo i bh. dijaspora širom svijeta, stvarajući platformu za saradnju, investicije, kulturološke razmjene i unapređenje života svih građana BiH, bez obzira na to gdje se nalazili.

### **Član 5. (Trajanje i teritorij djelovanja)**

Djelatnost Fondacije odvijati će se na neodređeno vrijeme na teritoriji Federacije Bosne i Hercegovine i van Bosne i Hercegovine u skladu sa pozitivnim zakonskim propisima.

### **Član 6. (Ciljevi i djelatnost)**

Ciljevi i djelatnost Fondacije su:

- a) organizovanje i podrška inicijativama koje omogućavaju jaču povezanost između bh. dijaspora i matične zemlje,
- b) pružanje informacija i resursa bh. iseljenicima kako bi se podržali njihovi profesionalni i lični projekti, te promovisanje povratka kao i investiranja u matičnu zemlju i Kanton Sarajevo,
- c) organizacija događaja, seminara i konferencija koji omogućavaju bh. dijaspori da aktivno doprinosi razvoju domovine i Kantona Sarajevo,
- d) aktivno zastupanje interesa domovine i Kantona Sarajevo na međunarodnoj sceni, posebno u pogledu obrazovnih, naučnih, kulturnih, sportskih i ekonomskih pitanja,
- e) promocija domovine i Kantona Sarajevo kao sigurne i atraktivne destinacije za ulaganje, turizam i međunarodnu saradnju,
- f) saradnja s vladinim i nevladinim organizacijama na globalnom nivou u cilju jačanja uticaja domovine i Kantona Sarajevo na međunarodnoj sceni,
- g) saradnja i angažman pravnih i fizičkih lica u domovini, a posebno onih u dijaspori, s ciljem promocije državotvornosti i očuvanja temeljnih postulata pravnog poretka domovine,
- h) okupljanje pojedinaca i institucija iz domovine i svijeta, posvećene jačanju državotvornosti i očuvanju temeljnih načela pravnog poretka domovine,
- i) olakšavanje investicija za bh. dijasporu u domovinu i Kantonu Sarajevo,
- j) poticanje ekonomske saradnje između bh. dijaspora i domaće privrede, kroz razvoj poslovnih mreža i inicijativa,
- k) pružanje savjetodavnih usluga bh. dijaspori vezanih uz investiranje, pokretanje biznisa ili podršku start-upovima,
- l) povećanje svijesti o mogućnostima za ulaganje u različite sektore u domovini i Kantonu Sarajevo,

- m) očuvanje kulturnih vrijednosti, tradicije i jezika među pripadnicima bh. dijaspora, kao i promovisanje tih vrijednosti širom svijeta gdje živi bh. dijaspora,
- n) organizovanje ekonomskih, sportskih, kulturnih, edukativnih i umjetničkih događanja koja povezuju domovinu, Kanton Sarajevo i bh. dijasporu,
- o) poticanje obrazovne saradnje, razmjena učenika, studenata i naučno-istraživačkih projekata između domovine, Kantona Sarajevo i zemalja gdje žive bh. iseljenici,
- p) kreiranje strateških partnerstava s organizacijama i udruženjima u zemljama bh. dijaspora radi zajedničkog djelovanja na pitanjima od interesa za domovinu i Kanton Sarajevo,
- q) koordinacija pomoći između domovine, Kantona Sarajevo i bh. dijaspora u slučaju prirodnih katastrofa ili drugih sličnih događaja.

#### **Član 7.**

##### **(Angažiranost Fondacije)**

Fondacija se može angažirati u bilo kojoj i u svim zakonskim vrstama aktivnosti u promoviranju svojih neprofitnih ciljeva.

#### **Član 8.**

##### **(Organi Fondacije)**

Organi Fondacije su:

- a) Upravni odbor,
- b) Direktor.

#### **Član 9.**

##### **( Osnivanje drugih tijela Fondacije)**

Fondacija može osnovati druga tijela (odbore) u skladu sa svojim potrebama.

#### **Član 10.**

##### **(Dužnost članova organa Fondacije)**

Članovi organa Fondacije su dužni svoje obaveze obavljati na način koji će biti na dobrobit Fondacije i njenih ciljeva.

#### **Član 11.**

##### **(Upravni odbor Fondacije, broj članova, imenovanje i razrješenje)**

- (1) Upravni odbor je upravno tijelo Fondacije.
- (2) Upravni odbor ima 3 (tri) člana, od kojih je jedan predsjednik Upravnog odbora.
- (3) Predsjednika i članove Upravnog odbora imenuje i razrješava Osnivač.
- (4) Izbor i imenovanje predsjednika i članova Upravnog odbora se vrši putem javnog oglasa kojeg raspisuje Osnivač u skladu sa procedurom i uslovima utvrđenim Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije Bosne i Hercegovine“, br. 12/03, 34/03 i 65/13), Statutom Fondacije i Odluke Osnivača o utvrđenim standardima i kriterijima za izbor i imenovanja.

#### **Član 12.**

##### **(Ovlasti i obaveze Upravnog odbora)**

- (1) Upravni odbor vrši kontrolu:
  - a) sprovođenja Statuta i drugih akata Fondacije,
  - b) sprovođenja programa i plana rada Fondacije,
  - c) zakonitosti u oblasti finansijskog i materijalnog poslovanja Fondacije, sprovođenje odluka, zaključaka i drugih akata Fondacije.
- (2) Upravni odbor imat će sljedeće ovlasti i obaveze:

- a) ostvaruje ciljeve Fondacije utvrđene u statutu,
- b) daje saglasnost za pravne radnje koje su preuzete u ime Fondacije prije njenog upisa u Registar fondacija Federalnog ministarstva pravde,
- c) upravlja imovinom Fondacije,
- d) vrši izmjene i dopune statuta uz prethodnu saglasnost Osnivača,
- e) imenuje lice ovlašteno za zastupanje i predstavljanje fondacije u svojstvu direktora Fondacije,
- f) imenuje lice ovlašteno za zastupanje i predstavljanje fondacije u svojstvu direktora u svrhu okončanja procedure upisa u Registar fondacija Federalnog ministarstva pravde, na period najduže do tri mjeseca,
- g) donosi opće akte Fondacije,
- h) odlučuje o osnivanje podružnica van teritorije Bosne i Hercegovine uz prethodnu saglasnost Osnivača,
- i) odlučuje o pripajanju, razdvajanju, transformaciji i prestanku rada Fondacije uz prethodnu saglasnost Osnivača,
- j) prati i poduzima mjere na prikupljanju sredstava za ostvarivanje ciljeva Fondacije,
- k) donosi godišnji program rada i finansijski plan Fondacije, koje dostavljaju Osnivaču,
- l) odlučuje o raspodjeli i upotrebi sredstava,
- m) odgovoran je za zakonito poslovanje Fondacije,
- n) priprema godišnji izvještaj o radu i utrošku finansijskih sredstava Fondacije, te druge izvještaje, koje dostavlja Osnivaču,
- o) donosi Poslovnik o svom radu,
- p) vrši druge poslove u skladu sa zakonom i statutom.

### **Član 13.**

#### **(Odluke i zapisnici Upravnog odbora)**

Odluke i zapisnici sa sjednica Upravnog odbora u vezi člana 12. biti će u pisanoj formi i moraju biti potpisane od strane predsjednika Upravnog odbora, ili osobe koju predsjednik Upravnog odbora ovlasti.

### **Član 14.**

#### **(Trajanje mandata)**

Dužina trajanja mandata predsjednika i članova Upravnog odbora je četiri (4) godine, sa mogućnošću reizbora.

### **Član 15.**

#### **(Predsjednik Upravnog odbora)**

- (1) Nakon imenovanja, predsjednik Upravnog odbora (ili osoba koju predsjednik Upravnog odbora ovlasti) će predsjedavati sjednicama Upravnog odbora.
- (2) Predsjednik Upravnog odbora može u pisanoj formi ovlastiti bilo kojeg drugog člana Upravnog odbora da vodi i predsjedava sjednicama.

### **Član 16.**

#### **(Sjednice Upravnog odbora)**

- (1) Upravni odbor se sastaje po potrebi.
- (2) Predsjednik Upravnog odbora saziva sjednicu u koordinaciji sa direktorom, a obavezan je sazvati sjednicu ukoliko to traže minimalno 2 (dva) člana Upravnog odbora ili Osnivač.



(3) Zapisnici sa održanih sjednica se dostavljaju Osnivaču.

#### **Član 17.**

##### **(Kvorum i donošenje odluka)**

(1) Upravni odbor ima kvorum kada su prisutna dva člana Upravnog odbora.

(2) Sve odluke, osim onih definisanih članom 18. Statuta donose se većinom glasova prisutnih članova.

#### **Član 18.**

##### **(Obavezna prisutnost)**

(1) Prisutnost svih članova/ica Upravnog odbora je obavezna za donošenje sljedećih odluka:

- a) odluke o upravljanju imovinom Fondacije,
- b) odluke o promjenama statuta,
- c) odluke o pripajanju, razdvajanju, transformaciji i prestanku rada fondacije.

(2) U slučajevima odlučivanja iz ovog člana potreban je konsenzus.

#### **Član 19.**

##### **(Donošenje odluka u vanrednim situacijama)**

U vanrednim situacijama, odluke iz člana 18. Statuta mogu se donositi i uz opravdano odsustvo maksimalno jednog člana Upravnog odbora pod uslovom da to Osnivač traži.

#### **Član 20.**

##### **(Odluka o razrješenju)**

Odluku o razrješenju predsjednika i članova Upravnog odbora donosi Osnivač.

#### **Član 21.**

##### **(Prestanak članstva u Upravnom odboru)**

Članstvo u Upravnom odboru završava:

- a) istekom mandata,
- b) pisanom ostavkom dostavljenom Upravnom odboru,
- c) razrješenjem člana od strane Osnivača u skladu sa članom 26. ovog Statuta,
- d) kada član Upravnog odbora Fondacije djeluje suprotno programskim ciljevima Fondacije,
- e) u slučaju smrti.

#### **Član 22.**

##### **(Naknada za rad)**

(1) Predsjedniku i članovima Upravnog odbora za rad pripada mjesečna naknada, uz uslov da je za taj mjesec održana sjednica, koja će se isplaćivati iz sredstava Fondacije, u skladu sa općim aktima Fondacije.

(2) Također, predsjednik i članovi Upravnog odbora mogu primati naknadu za putne i slične troškove, koji su u direktnoj vezi sa ostvarivanjem zakonitih ciljeva i aktivnosti Fondacije.

#### **Član 23.**

##### **(Odsustvo Predsjednika)**

Predsjednika Upravnog odbora zamjenjuje lice koje isti ovlasti iz reda članova Upravnog odbora.

#### **Član 24.**

##### **(Načini učestvovanja i glasanja)**

Članovi Upravnog odbora mogu učestvovati i glasati na sjednicama Upravnog odbora, putem telefona, telefaksa ili drugih elektronskih sredstava.



## Član 25.

### (Profesionalna etika i povjerljivost)

- (1) Članovi Upravnog odbora dužni su postupati u skladu sa najvišim standardima profesionalne etike, nepristrasnosti i odgovornosti.
- (2) Članovi Upravnog odbora obavezni su čuvati kao povjerljive sve informacije do kojih dođu u vršenju svojih dužnosti, a koje nisu javno dostupne, te ih ne smiju koristiti za ličnu ili tuđu korist.
- (3) Obaveza čuvanja povjerljivosti traje i nakon prestanka mandata u Upravnom odboru.

## Član 26.

### (Sukob interesa)

- (1) Član Upravnog odbora dužan je obavljati svoju dužnost savjesno, odgovorno i nepristrasno, te izbjegavati svaki stvarni ili potencijalni sukob interesa.
- (2) Sukob interesa postoji kada član Upravnog odbora:
  - a) učestvuje u odlučivanju o dodjeli sredstava za projekte u kojima on lično, član njegove porodice, ili pravno lice s kojim je povezan ima direktan ili indirektan finansijski interes;
  - b) ima profesionalne ili druge interese koji mogu uticati na njegovu nepristrasnost u vršenju dužnosti.
- (3) U slučaju postojanja sukoba interesa, član Upravnog odbora je dužan odmah obavijestiti ostale članove Upravnog odbora i Osnivača, te se izuzeti iz svakog postupka odlučivanja u vezi sa predmetnim pitanjem.
- (4) Ako član Upravnog odbora ne postupi u skladu sa stavom (3) ovog člana, može biti razriješen dužnosti prije isteka mandata.

## Član 27.

### (Imenovanje i razrješenje direktora Fondacije)

- (1) Svakodnevnim aktivnostima i poslovima Fondacije upravljat će direktor Fondacije, koji će biti imenovan u skladu sa Statutom i djelovat će u tom svojstvu u periodu od 4 (četiri) godine, a mandat mu može biti obnovljen.
- (2) Direktora imenuje i razrješava Upravni odbor.
- (3) Direktora privremeno imenuje Upravni odbor na period najduže do tri mjeseca, u svrhu procedure upisa u Registar fondacija Federalnog ministarstva pravde.

## Član 28.

### (Prava i obaveze direktora Fondacije)

Direktor Fondacije će imati pravo da u ime Fondacije:

- a) nastupa u odnosima sa trećim stranama, javnim ili privatnim,
- b) zaključuje ugovore i na drugi način preuzima obaveze,
- c) predlaže strateški plan Fondacije,
- d) zastupa i predstavlja Fondaciju u skladu sa odlukama Upravnog odbora, Statutom i važećim zakonskim propisima,
- e) priprema godišnje budžete i dostavlja ih Upravnom odboru na usvajanje;
- f) priprema izvještaje o aktivnostima Fondacije,
- g) predlaže materijale za sjednice Upravnog odbora,
- h) kroz odnose sa javnošću aktivno promovira misiju i ciljeve Fondacije,
- i) organizuje aktivnosti Fondacije,
- j) radi na pribavljanju sredstava za Fondaciju,
- k) za svoj rad odgovara Upravnom odboru Fondacije,
- l) obavlja i druge poslove koje mu u zadatak stavi Upravni odbor u skladu sa Statutom i općim aktima Fondacije.

## **Član 29.**

### **(Uslovi za razrješenje direktora)**

Upravni odbor može razriješiti direktora Fondacije, uz prethodnu saglasnost Osnivača u slučaju:

- a) ukoliko obavlja aktivnosti protivne dobrobiti Fondaciji,
- b) u slučajevima kršenja važećih propisa u Bosni i Hercegovini.

## **Član 30.**

### **(Zastupanje i predstavljanje)**

(1) Fondaciju zastupa i u pravnom prometu predstavlja direktor Fondacije.

(2) Direktora Fondacije u slučaju spriječenosti mijenja lice koje on/a ovlasti (u slučaju da iz objektivnih razloga Direktor nije u mogućnosti odrediti lice koje ga mijenja, odluku o zamjeni donosi Upravni odbor).

## **Član 31.**

### **(Opis oblika, sadržaj, čuvanje i upotreba pečata)**

(1) Fondacija ima pečat koji je okruglog oblika, prečnika 30 mm, sa sljedećim sadržajem: FONDACIJA "Zajedno sa dijasporom za jaču domovinu", koji je ispisan latiničnim pismom sa upisanim sjedištem "Sarajevo" u sredini.

(2) Za upotrebu i čuvanje pečata odgovoran je direktor Fondacije.

## **Član 32.**

### **(Opis oblika i sadržaj znaka)**

Znak Fondacije će predstavljati stilizirana ruka koja drži domovinu i izlazi iz karte svijeta sa siluetom domovine, što će imati značenje da dijaspora nosi i podržava domovinu.

## **Član 33.**

### **(Sredstva Fondacije)**

Sredstva Fondacije čine:

- a) dobrovoljni prilogi, donacije i pokloni fizičkih i pravnih lica,
- b) sredstva dodijeljena iz Budžeta Kantona Sarajevo,
- c) sredstva dodijeljena sa drugih nivoa vlasti u Bosni i Hercegovini,
- d) prihodi od kamata, dividendi, dobiti od kapitala, zakupnina, honorara i sličnih izvora,
- e) drugi prihodi stečeni u skladu sa Zakonom i ovim Statutom.

## **Član 34.**

### **(Nekretnine, materijalna ili nematerijalna dobra Fondacije)**

(1) Fondacija može posjedovati nekretnine, materijalna ili nematerijalna dobra, kao i druge vrste svojine stečene na zakonski način.

(2) Fondacija će imati pravo vlasništva nad takvom svojinom, uključujući i pravo na posjedovanje, korištenje i raspolaganje sredstvima u skladu sa odlukama svojih upravnih tijela i na način sukladan ovom Statutu i zakonima Bosne i Hercegovine.

(3) Fondacija može, također, nastupati u ulozi najmodavca ili najmoprimca u odnosu na nekretnine.

## **Član 35.**

### **(Troškovi Fondacije)**

(1) Projekcija troškova za administraciju Fondacije se određuje planom i programom rada na nivou koji će omogućiti finansiranje aktivnosti najdalje do 31. 12. naredne fiskalne godine.



(2) Administrativni troškovi Fondacije su troškovi neophodni za očuvanje, nabavku i obnavljanje imovine, promoviranje Fondacije u javnosti, te troškove neophodne za rad organa Fondacije određenih ovim Statutom.

#### **Član 36.**

##### **(Način korištenja imovine)**

Način korištenja imovine Fondacije:

- a) fondacija će svoju imovinu koristiti u svrhu ostvarivanja ciljeva radi kojih je osnovana te radi organizovanja promocija, prezentacija i drugih skupova na kojima se govori o ciljevima Fondacije,
- b) fondacija će svoja sredstva i imovinu koristiti u promoviranju svojih neprofitnih ciljeva kao što su opisani u ovom Statutu,
- c) imovina ili sredstva ne mogu biti korištena kao garancija za bilo kakve obaveze Fondacije ili trećih lica,
- d) sva finansijska sredstva Fondacije moraju biti korištena u skladu sa važećim zakonskim propisima u Bosni i Hercegovini.

#### **Član 37.**

##### **(Program rada i Finansijski plan)**

Upravni odbor za svaku poslovnu godinu donosi finansijski plan Fondacije, koji je sastavni dio godišnjeg programa rada Fondacije.

Program rada i finansijski plan usvaja Upravni odbor većinom ukupnog broja glasova.

Na kraju poslovne godine donosi se godišnji obračun po istom postupku kao i finansijski plan.

#### **Član 38.**

##### **(Vođenje poslovnih knjiga)**

Fondacija osigurava uredno vođenje poslovnih knjiga i sastavljanje finansijskih izvještaja u skladu sa zakonom i drugim propisima.

#### **Član 39.**

##### **(Podnošenje Izvještaja o radu i utrošku finansijskih sredstava, te Programa rada i finansijskog plana)**

Godišnji program rada sa finansijskim planovima Upravni odbor je dužan dostaviti Osnivaču najkasnije do 31. decembra tekuće godine za sljedeću godinu, a godišnji izvještaj o radu sa finansijskim izvještajem, najkasnije do 15. marta naredne godine za prethodnu godinu.

#### **Član 40.**

##### **(Nadzor)**

Nadzor nad namjenskim korištenjem i raspolaganjem sredstvima Fondacije dodijeljenim iz Budžeta Kantona Sarajevo vrši Ministarstvo finansija Kantona Sarajevo.

#### **Član 41.**

##### **(Izmjene i dopune Statuta)**

- (1) Odluka o izmjenama ili dopunama ovog Statuta spada isključivo u nadležnost Upravnog odbora uz prethodnu saglasnost Osnivača.
- (2) Ukoliko dođe do izmjene ili dopune ovog Statuta, iste će biti dostavljene nadležnom Ministarstvu, na način i u vremenskom roku specificiranom zakonodavstvom Federacije Bosne i Hercegovine.
- (3) Postupak specificiran u čl. od 41. do 42. će se isto tako primijenjivati i na usvajanje novog Statuta.

## Član 42.

### (Osnivanje podružnica van Bosne i Hercegovine)

- (1) Fondacija može osnivati podružnice, predstavništva i druge organizacione oblike i van teritorije Bosne i Hercegovine, u skladu sa zakonima zemlje u kojoj se podružnica osniva, te u skladu sa važećim propisima Federacije Bosne i Hercegovine.
- (2) Odluku o osnivanju podružnice iz stava 1. ovog člana donosi Upravni odbor Fondacije, uz prethodnu saglasnost Osnivača.
- (3) Podružnice osnovane van teritorije Bosne i Hercegovine djeluju u skladu s ovim Statutom, aktima Fondacije i zakonima države u kojoj su osnovane, te su dužne da svoj rad usklade s misijom i ciljevima Fondacije.

## Član 43.

### (Uslovi i postupak za pripajanje, razdvajanje, transformaciju ili raspuštanje, odnosno prestanak rada fondacije)

- (1) Fondacija prestaje sa radom kada prestane svrha njenog osnivanja, odlukom Upravnog odbora uz prethodnu saglasnost Osnivača.
- (2) Fondacija se može pripajati, razdvajati i transformisati samo u drugu fondaciju.
- (3) Upravni odbor Fondacije može donijeti odluku o pripajanju, razdvajanju, transformaciji ili prestanku rada Fondacije uz prethodnu saglasnost Osnivača.
- (4) O prijedlogu odluke o pripajanju, razdvajanju, transformaciji ili prestanku rada Fondacije Upravni odbor odlučuje konsenzusom uz obavezno prisustvo svih članova.
- (5) Odlukom o prestanku rada Fondacije utvrđuje se način zaštite prava korisnika Fondacije i druga pitanja od značaja za prestanak rada Fondacije.
- (6) Fondacija prestaje postojati brisanjem iz Registra fondacija Federalnog ministarstva pravde.

## Član 44.

### (Pravila za raspodjelu imovine u slučaju prestanka rada fondacije)

- (1) U slučaju prestanka rada Fondacije odluku o raspodjeli preostale imovine Fondacije donosi Upravni odbor uz prethodnu saglasnost Osnivača.
- (2) Likvidacija Fondacije, uključujući i raspolaganje njenim sredstvima, bit će izvršena na način koji odredi Upravni odbor, a na način sukladan zakonu Bosne i Hercegovine.
- (3) Odlukom Upravnog odbora da se preduzme likvidacija Fondacije određuje se i sljedbenik na kojeg prelaze prava i obaveze Fondacije, u skladu sa zahtjevima zakona Bosne i Hercegovine.
- (4) Kriteriji za raspolaganje imovine u slučaju prestanka rada Fondacije su da:
  - a.) nasljednik Fondacije ne može biti komercijalno pravno lice.
  - b.) nasljednici mogu biti isključivo nevladine organizacije, koje se bave promoviranjem osnovnih ciljeva Fondacije.

## Član 45.

### (Javnost rada fondacije)

- (1) Rad Fondacije je javan, a ostvarivanje ovog načela ne može biti u suprotnosti sa interesima i poslovanjem Fondacije.
- (2) Javnost rada Fondacije ostvaruje se dostavljanjem izvještaja o radu i finansijskom poslovanju Osnivaču, objavljivanjem općih akata i odluka na Web stranici i oglasnoj ploči Fondacije i na drugi način, u skladu sa važećim propisima.
- (3) Direktor ili lice koje on/a ovlasti može davati podatke i obavještavati sredstva javnog informisanja, kao i odlučivati o sazivanju konferencije za štampu i ostvarivati druge vidove saradnje sa sredstvima javnog informisanja.



**Član 46.**

**(Supsidijarna primjena propisa)**

Pitanja koja nisu regulisana ovim statutom Upravni odbor će riješiti u skladu sa važećim propisima Bosne i Hercegovine.

**Član 47.**

**(Čuvanje Statuta)**

Statut će se čuvati u sjedištu Fondacije i kod Osnivača.

**Član 48.**

**(Stupanje na snagu)**

Ovaj Statut stupa na snagu danom donošenja.

Broj: 14-45-16317-12/25  
Sarajevo, 10.10.2025. godine

1. Ured Vlade Kantona Sarajevo za dijasporu,
2. Fondacija (x3),
3. Arhiva.

